

## КАРАБИНТАЙ ГҮЙЦЭТГЭХ АЖИЛЛАГАА

1. Карабин /гар пулемёт/-ыг “хөлд” байдлаас “оосорт” авахдаа **“Буу-ООСОРТ”** командаар гурван хуваариар гүйцэтгэнэ:

1.1. баруун гараар карабин /гар пулемёт/-ыг эгц дээш өргөж, хүхээ /гар пулемётын гар бариул/-г зүүн тийш харуулан эргүүлж, зүүн гараар карабин хүхээ /гар пулемётын нуруувч/-нээс атгаж, амыг нь нүдний харалдаа түвшинд барьж, баруун гарын тохойг атгана /Зураг 57/.

1.2. бууг хөдөлгөхгүйгээр биенээсээ бага зэрэг хөндийрүүлэн баруун гараар оосроос атгана.

1.3. карабин /гар пулемёт/-ыг мөрнийхөө ар руу хойш нь хаяж, зүүн гараа буулгаж, баруун гараа оосрын дагуу гүйлгэн барьж, карабин /гар пулемёт/-ыг тохойгоороо бие рүүгээ ялимгүй шахна.



Зураг 57. Бууг хөлд, мөрөнд, гарт авах ажиллагаа

2. Карабин /гар пулемёт/-ыг **“Оосорт”** байдлаас **“Хөлд”** авахдаа **“Буу-ХӨЛД”** командаар хоёр хуваариар гүйцэтгэнэ:

2.1. карабин /гар пулемёт/-ыг баруун гараар оосор дагуулан дээш өргөж, мөрнөөс мултлаад, зүүн гараар онгоц мод, баруун гараар гол төмрийн нуруувчийн дээд хэсгээс хүхээ /гар пулемётын гар бариул/-г зүүн тийш харуулан, амыг нь нүдний харалдаа түвшинд барина.

2.2. баруун гараар карабин /гар пулемёт/-ыг доош буулгахдаа зүүн гарын алгыг доош харуулж, хуруунуудыг тэнийлгэн эрхий хуруугаар овооны дороос тулан сойж карабин /гар пулемёт/-ыг хөлийн дэргэд газарт зөөлөн тавимагц, зүүн гарыг огцом татан авна.

Ротын пулемётыг **“Оосорт”** байдлаас **“Хөлд”** аль болох тохиромжтой байдлаар авна.

3. Карабиныг **“Хөлд”** байдлаас **“Мөрөнд”** авахдаа зөвхөн тэнийлгэсэн

жадтайгаар **“Буу-МӨРӨНД”** командаар хоёр хуваариар авна:

3.1. карабиныг баруун гараар өргөн замгийг урагш харуулан эргүүлж, биеийн зүүн талд авчрангуут мөрлөгчөөр нь зүүн гарын алган дээр тавьж, баруун гараар онгоц мод, гол төмрийн нуруувчны дээд хэсгээс атгана. Энэ үед зүүн гарын эрхий хуруу нь мөрлөгчийн урд талд, бусад хуруу нь мөрлөгчийн зүүн талаас атгасан байхаар карабиныг эгц барих ба баруун гарын тохойг мөрний түвшинд барина. /Зураг 58/.



Зураг 58. Бууг мөрөнд авах ажиллагаа

4. Карабиныг **“Мөрөнд”** байдлаас **“Хөлд”** авахдаа **“Буу-ХӨЛД”** командаар гурван хуваариар гүйцэтгэнэ:

4.1. буу барьсан зүүн гарыг огцом буулган баруун гараар онгоц мод, гол төмрийн нуруувчны дээд хэсгээс атгана.

4.2. замагтай талыг нар зөв эргүүлэн карабиныг баруун гараар баруун хөл дагуулан буулгаж, зүүн гараа шилжүүлэн овооны доод хэсгээс сойж, мөрлөгчийн хойт ул баруун хөлийн чигчий хурууны харалдаа байхаар баруун гуяны дагуу барина.

4.3. баруун гараар карабиныг мөрлөгчөөр нь газар зөөлөн тавьж, зүүн гарыг огцом татаж авна.

5. Карбин /гар пулемёт/-ыг **“Оосорт”** байдлаас **“Нуруунд”** авахдаа **“Буу-НУРУУНД”** командаар 45 дугаар зүйлд заасан журмаар гүйцэтгэнэ. Карабиныг, жадыг нь нугалсан байдлаар **“Нуруунд”** авна.

6. Карбин /гар пулемёт/-ыг **“Нуруунд”** байдлаас **“Оосорт”** авах ажиллагааг **“Буу-ООСОРТ”** командаар 46 дугаар зүйлд заасан журмаар гүйцэтгэнэ.

7. Карабиныг **“Нуруунд”** байдлаас **“Хөлд”** авахдаа бууг урьдчилан оосорт авна.

8. Карабиныг **“Мөрөнд”** авч явах үед **“ЗОГС”** командаар зогсож, **“Буу-ХӨЛД”** командаар /энэ хавсралтын 4 дүгээр зүйл/ карабиныг хөлд авахуулна.

9. Хөдөлгөөний үед карабиныг **“Хөлд”** байдлаас **“Мөрөнд”** авах ажилагааг байран дээрхтэй /энэ хавсралтын 3 дугаар зүйлд/ адилаар зүүн хөлийг газарт тавингуут өгөх **“Буу-МӨРӨНД”** командаар гүйцэтгэнэ.

Энэ командаар баруун хөлөө нэг алхаж, дараа нь зүүн хөлөө газарт тавих

бүрт хуваарьт тохируулан карабиныг мөрөнд авна.

10. Хөдөлгөөний үед карабиныг **“Мөрөнд”** байдлаас **“Хөлд”** авах ажиллагааг байрны дээрхтэй /энэ хавсралтын 4 дүгээр зүйл/ адилаар зүүн хөлөө газарт тавингуут өгөх **“Буу-ХӨЛД”** командаар баруун хөлөө нэг алхаж, дараа нь зүүн хөлөө газарт тавих бүрт хуваарьт тохируулан гүйцэтгэнэ.

11. **“Буу-МӨРӨНД”** командыг гүйцэтгэхийн өмнө хутган жадыг сунгана. **“Хутган жад-СУНГА”** командыг хоёр хуваарьтайгаар гүйцэтгэнэ:

11.1. зүүн гарын эрхий хуруугаар түгжээг доош дарж суллан, жадыг урагш нь татаж хуруунуудын үеэр дороос нь тулна.

11.2. жадыг гэдрэг татаж гүйцэд тэнийлгэн түгжээд зүүн гарыг огцом татаж авна.

12. Карабин **“Хөлд”** байдалд байхад жадыг нугална. **“Хутган жад-НУГАЛ”** командыг хоёр хуваарьтайгаар гүйцэтгэнэ:

12.1. зүүн гарын алгыг доош харуулан дөрвөн хуруугаар жадны бариулын дээрээс эрхий хуруугаар дотор талаас нь барьж жадыг дээш нь татан түгжээг суллаж, жадыг доош нь хагас нугалан, зүүн гарын хуруунуудын дунд үеэр дээр нь зөөлөн дарна.

12.2. жадыг гүйцэд дарж нугална.

12.3. Карабинтайгаар ёсолж хүндрэх

13. **“Харуул, НОМХОН”, Буу-ХАРУУЛД** командаар карабиныг **“Хөлд”** авсан байдлаас дараах хоёр хуваариар ёсолж хүндэлнэ:

13.1. баруун гараар карабиныг өргөж, гол төмрийг нь цээжээ голлуулан, хараатай талыг өөр рүүгээ харуулан эгц барингуут, зүүн гарын дөрвөн хуруу нь хүхээний дээд талд, эрхий хуруу нь хараатай талын доогуур, гарын сарвууг бүсний харалдаа байхаар барьж зогсоно/Зураг 59/.

13.2. баруун гараа мөрлөгчийн шил бариулд түргэн шилжүүлж эрхий хурууг ар талаас нь, бусад хурууг нийлүүлэн тэнийлгээд шил бариулын урд ташуудуу тавьж, хуруунуудыг шулуун байлгана /Зураг 59/.



Зураг 59. Бууг харуулд авч ёслох

14. Карабиныг **“Харуулд”** байдлаас **“Хөлд”** авахдаа **“Буу-ХӨЛД”** командаар гүйцэтгэнэ. Анхааруулах командаар толгойг эгцлэн, гүйцэтгэх командаар гурван хуваариар карабиныг **“Хөлд”** авна:

14.1. баруун гарыг дээш шилжүүлэн, карабины онгоц мод, гол төмрийн нуруувчны дээд хэсгээс барина.

14.2. мөрлөгчийн хойт ул баруун хөлийн чигчий хурууны харалдаа байхаар баруун гараар карабиныг доош буулгаж, зүүн гараар овооны доод хэсгээс сойж барина.

14.3. баруун гараар карабиныг мөрлөгчийн улаар нь газарт зөөлөн тавьж, зүүн гарыг огцом татаж авна

15. Карабиныг **“Харуулд”** авч ёслох ажиллагааг цэргийн анги , салбар зөвхөн байран дээр жагсах үед хэрэглэнэ.

Карабиныг **“Харуул, НОМХОН”, “Буу-ХАРУУЛД”, “Зэргэц-БАРУУН ТИЙШ /ЗҮҮН ТИЙШ, ДУНДАА/”** командаар **“Харуулд”** авна.

Энэ командаар жагсаалд байгаа цэргийн бүх алба хаагч жагсаалын үндсэн зогсолтод шилжиж, захирагч /дарга/-ийн зүг толгойгоо эргүүлэн түүнийг хараагаараа дагуулна. Хэрэв жагсаал дотор автомат, пулемёт, гранатомёттой цэргийн алба хаагч байвал тэдний бууг урьдчилан ёсолгооны байдалд авахуулна.